



STATEN VAN ARUBA

Presidente di Parlamento di Aruba
Sr. mr. E.G.A. Vrolijk
L.G. Smith Blvd. 72
Aruba

Oranjestad, 3 januari 2023

Apreciado Sr. Presidente,

Pa medio di e carta aki suscrito kier a pidi Sr. Presidente dirigi e siguiente contesta na, sra. mr. Evelyn Wever-Croes, Prome Minister, su carta fecha 17 november 2022 y ricibi na Parlamento 18 november 2022 tocante democracy deficit den Reino. Gradiciendo di antemano pa su amabel cooperacion suscrito ta keda,

Atentamente,

Miguel J. Mansur
Lider di Fraccion ACCION 21

STATEN VAN ARUBA

Ingek: 03 JAN 2023

Volgnr: IS/371/22-23



Mw. mr. E.C. Wever-Croes
Minister President
L.G. Smith Boulevard 76
Oranjestad

Apreciado sra. Wever-Croes,

Den contesta pa su carta di 18 november 2022 nos fraccion kier a trece nos opinion dilanti tocante e diferente proposicionnan pa atende cu e 'democracy deficit'. Nos preferencia ta pa e 'Danish model' pero nos lo discuti tur cuatro proposicion.

1. Parlamento di Reino/Koninkrijks Parlement

Esaki ta e proposicion menos favorabel segun nos fraccion. E relacion entre Aruba, e otro islanan y Hulanda ta sufri di loke na ingles ta ser yama 'binocular vision'. Di un punto di bista Arubano nos relacion cu Hulanda ta un di esunnan mas importante si no esun mas importante. Di Hulanda su punto di bista nan relacion cu nos ta uno marginal y nos no ta premira cu esey lo cambia mirando nos tamaño.

Nos preocupacion cu e concepto di un Parlamento di Reino ta cu su importancia lo ta marginal mirando e desequilibrio den e relacion entre Hulanda y e paisnan Caribeño di Reino.

2. Otorga habitantenan Caribeño derecho di voto pa Eerste y Tweede Kamer

Nos tin varios preocupacion cu e concepto aki, na prome luga Reino ta consisti di cuatro pais autonomo, den nos opinion lo ta iregular pa habitantenan di un pais tin derecho di voto den eleccionnan nacional di un otro. Fuera di esey e kiesdeler na Hulanda ta actualmente rond di 100,000 y e cantidad di votado na Aruba ta rond di 60,000. Te hasta si henter Aruba uni tras di un partido of candidato nos no lo alcanza e minimo pa logra un asiento. Mirando e division politico local cu x12 partido participando den ultimo eleccion ta improbabel cu votonan di Aruba lo por traduci den algo significativo den Eerste of Tweede Kamer.

Maximo cu e opcion aki lo por logra ta cu votadonan Arubano lo haya algo di influencia den diferente partidonan Hulandes directamente of indirectamente via partidonan ruman local.

3. Añadi asientonan adicional reserva pa e islanan den Tweede y Eerste Kamer

Esaki ta un proposicion discuti na ultimo IPKO na Hulanda y preferencia di nos fraccion. Den practica a surgeri añadi tres asiento na Tweede Kamer y reserva un pa cada di e islanan. Nos



fraccion ta kere cu e asientonan aki mester ta igual na esnan Hulandes mescos cu e 'Danish model'. Nos no ta di acuerdo pa nan ta limita pa vota unicamente riba asuntonan di Reino mirando cu hopi asunto indirectamente ta afecta nos riba e islanan p.e. clima. Si e asientonan aki no ta limita, nan lo por duna e islanan un influencia bentahoso si nan ta necesario pa forma un gobierno por ehempel.

Den opinion di nos fraccion esaki lo coregi e democracy deficit cu tin actualmente den e parti legislativo di Reino. Ta importante pa Aruba mantene su Minister Plenipotenciario como representante den e parti ehecutivo di Reino. Cualquier argumento cu representacion den Tweede Kamer no ta necesita un Minister Plenipotenciario por facilmente wordo contra aresta pa e diferencia grandi den tamaño entre e paisnan di Reino.

Nos fraccion ta kere cu e asiento di Aruba den Tweede Kamer lo mester ser elegi localmente pa tur votadonan pa un candidato cu por forma parti di un partido of ta independiente. Lo mester discuti si e asiento lo sigui e mesun termino cu Parlamento Hulandes of un periodo fiho di cuatro aña.

E proposicion tambe ta inclui 1-2 asiento pa e islanan den Eerste Kamer. E asiento(nan) ey por wordo elegi pa votadonan di e tres islanan den comun cu residente di cualquier isla cualifica pa postula.

4. Otorga na Parlamentarionan di e islanan derecho di iniciativa of e derecho di voto como delegadonan special.

Esaki ta e proposicion mas problematico segun nos fraccion. Na prome luga sin un asiento den Tweede Kamer nos representacion no lo ta permanente y tampoco goza di e sosten y recursonan di un miembro di Tweede y/of Eerste Kamer. Mas leu Aruba su 21 Parlamentarionan lo tin un voto igual na 1/21 di un miembro di Tweede Kamer dus mi ta kere esaki ta e opcion cu menos beneficio y influencia lo trece pa nos pueblo. Tambe esaki lo interumpi funcionamiento di nos Parlamento local ya cu lo mester ta pendiente di reunionnan y leyman na Hulanda como na cas. Esaki no ta optimal y lo hiba na un representacion na cas y na Tweede Kamer cu no ta digno di nos pueblo y pais.

Tocante e mocion Van Raak na proximo IPKO e islanan lo presenta nos proposicion pa establece un mecanismo di disputa entre e paisnan di Reino, e asina yama geschillenregeling.

Ta opinion di nos fraccion cu e principio di un pais un voto ta organa cu establecimiento di United Nations na 1945 despues di Segundo Guerra mundial. E realidad di nos sistema internacional ta haci'e dificil y na UN mes e no ta honra mirando existencia di e Security Council



cu miembronan permanente cu derecho di veto. Dus e principio di un pais un voto ta idealistico pero dificil pa implementa den practica.

Un union di nacionnan mas moderno ta Union Europeo cu tin un sistema di voto mas realistico y nos ta kere mas practico. Nos fraccion ta kere cu esey ta un ehempel di cual por saca un modelo pa Reino cu diferente decisionnan necesitando diferente resultado p.e. dos voto (Aruba, Corsou, Sint Maarten y/of Hulanda) y un mayoria di habitantenan di Reino. Den e ehempel aki Hulanda no por wordo exclui pero tampoco por dicidi sin sikiera un di e paisnan CAS ta vota cu nan.

Un cos cu a ser discuti na ultimo IPKO ariba iniciativa di D66 ta abolicion di e necesidad pa registra pa habitantenan di e islanan participa den eleccion Europeo. Nos fraccion ta sostene esaki completamente y spera cu gobierno lo ofrece tur cooperacion pa logra esaki mas pronto cu ta posibel.

Finalmente mirando e importancia di e topiconan aki nos fraccion ta surgeri pa Aruba su delegacion na e Koninkrijksconferentie 2023 inclui lider di tur partido representa den Parlamento como minimo.

Atentamente,

Miguel J. Mansur
Lider Fraccion ACCION 21